

■ CONVIVENZA

«Masters of Disaster»

DA PIEDER CAMINADA*

A tgnamain è il chau qua per patratgar. E per patratgar suenter (sco ch'ins di magari en il linguatg discurre). Ma «patratgar suenter» fiss atgnamain il patratgar «suenter il patratgar» – pia considerablain pli intensiv che mo il «patratgar» normal. Ubain tenor la definiziun tudestga dal verb: «sa fatschentar en patratgs minuziusamain cun insatgi, insatge; ponderar profundamain; patratgar suenter ditg, conscientiusamain, profundamain (davart insatge)».

N agin carstgaun na po adina be patratgar suenter – quai fiss memia stentus. Ma patratgar va adina. Nus patratgain permanentamain – perfin la notg, cura che nus durmin. E siemiain.

P atratgar durmind. Cura ch'jau sun ma sveglia dacurt m'è vegnì endament sco emprim ch'jau aveva siemià da la chanzun da *Bob Dylan* cun il titel «Masters of War» («Signurs da la guerra»). En mes chau resunava anc la melodia. Dentant senza il text. E perquai ch'il patratgar suenter po far senn perfin suenter il patratgar nocturn (qua en furma d'in siemi) sun jau m'approfondà en «Masters of War» da *Bob Dylan*. Ed hai legì strofas sco questa:



*Vus che n'avais
mai fatg insatge auter
che construir per disfar,
vus giugais cun mes mund
sco sch'el fiss voss giugaret.*

M a diavel e quatter, pertge aveva jau siemià gist da la chanzun «Masters of War» da *Bob Dylan*, ina chanzun ch'jau n'aveva notabene betg pli tadlà dapi lung temp? Forsa perquai che blers potentats e politichers discurren en connex cun la pandemia da corona gugent da la «guerra cunter il virus»?

T gi sa. Durant far ponderaziuns davart la strofa menziunada m'è puspè vegnì endament ch'jau aveva legì la saira avant in artigel davart la moda da populists e dictaturs da dretga e da sanestra dad ir enturn cun la pandemia da corona. Per exempel il president dals Stadis Unids *Donald Trump*, il schef da stadi sanester-naziunalistic dal Mexico *Andrés Manuel López Obrador*, il president brasilian *Jair Bolsonaro*, il despot da la Bielorussia *Alexander Lukaschenko* ubain il

potentat chinai *Xi Jinping*. Els tuts ageschan en il temp da la crisa da corona a moda privlusamain irraziunala ed expriman chaussas idioticas – apparentamain senza patratgar (suenter). Els fan beffas dal virus mortal, bagatelleschan u taschentan el, malgrà che las cifras stgettas demussan il cuntrari. Ubain ditg cun auters plets: Els giogan cun noss mund sco sch'el fiss lur giugaret.

I l davos temp han blers musicists scrit chanzuns da corona ubain interpretà da nov chanzuns gia existentas sut l'ensaina da corona. Dals *Rolling Stones* enfin als *Rumantschs* cun *Pascal Gamboni*, *Paula Cadonau*, *Andi Schnoz*, *Benedetto Vigne* e cumpogns. Da *Bob Dylan* n'hai jau anc betg udì ina chanzun da corona. El na sto era betg scriver ina. El po simpelmain prender sia chanzun «Masters of War», adattar il text tscha e là – dapli na dovri betg per disfamar il deputament stupid da *Trump*, *Bolsonaro*, *Lukaschenko* e consorts en connex cun corona. Ina proposta per il titel da la chanzun avess jau dal reminent era gia: Co fissi cun «Masters of Disaster»?

* **Pieder Caminada** è mainaproject scolaziun e redactor tar la «Südostschweiz». El è creschi si a Glion en il ambient surtut tudestg e viva oz en il vitg rumantsch da Castrisch.

La «Convivenza» è ina seria da columnas che cumpara il glindesdi en La Quotidiana e la «Südostschweiz».